



20. august 2021

UKA 2021/75

Inatsisartut suleriaasianni § 33 tunngavigalugu matumuuna aalajangiiffigisassatut siunnersuuteqarpunga:

Inatsisartut isummerfigisassaattut siunnersuut, Naalackersuisut peqquneqassasut Angalallutik immikkut suliaqartussanik pilersitseqqullugit, immikkut atuartitsinermit tapersiinermit suliaqartussanik tassani sineriammi atuarfinni ilinniartitsisut aaliangersimasut immikkut atuartitsinerat qaffassarniarlugu.

(Inatsisartunut ilaasortaq Nivi Olsen, Demokraatit)

Tunngavilersuut

Ukiumi atuarfiusumi 2019/2020 meeqqat atuarfiat 7.382-inik atuartoqarpoq. Taakkunannga atuartut 822 arlaatigut immikkut atuartinneqarput. Atuartunit taakkunannga 78,1 procent nukappiaraapput. Tassani ukiumi atuarfiusumi meeqqat atuarfianni piffissami atuartitsiffiusumi katillugu 24 procent immikkut atuartitsiffiuvoq, taakkuninnga 63,7 procent immikkut klassinut pilersinneqarsimasuni 63,7 procent atuartitsiffiusarluni.¹

Allatut oqaatigalugu, immikkut atuartitsineq pisariaqartinneqarpoq, aammali pisariaqartinneqarluni, immikkut atuartitsinerup pitsanngorsarnissaa. Minnerunngitsumik siunertaralugu, ullumikkumiit atuartut amerlanerujussuit meeqqat atuarfianni inaarutaasumik misilitsinnerni angusisinnaanissaat, suli amerlanerusut ilinniagaqarnermi alloriarnerup tullissaannut piareersarluarneqarniassammata.

Qularutissaanngilarli, suliassaq una imaannaanngimmat. Inuit amerlanngitsut nunami angisoorsuarmi najugaqartuuvugut, ajornakusoorsinnaavorlu piffinni tamani immikkut atuartitsinermit piginnaasat pisariaqartut qulakkeernissaat. Taamaattumik Demokraatit siunnersuutigaa, angalasartussanik pilersitsisoqassasooq, piffinni immikkut ittumik atuartitsinermit ikorfartuisussanik toqqaannartumik atuartitsinermit aammalu ilinniartitsisut piginnaasaannik qaffassaasussat.

Isumaqarpugut, suliniutip taassuma qulakkeeqataaffigisinnaagaa, meeqqat ikinnerusut meeqqat atuarfianni katanneqarnerat aammalu, suliniutip qulakkiissagaa, atuartut unaminartitalit amerlanerusut meeqqat atuarfianni inaarutaasumik misilitsinnermi angusisinnaanngornissaat.

Demokraatit neriuutigaa siunnersuummut Naalackersuisunit Inatsisartunilu partiinik amerlanerusuteqartunit taparserneqarnissartik.

Pisortanut aningaasatigut allaffissornikkullu kingunerisassai

Naalackersuisut §37-apeqqummut normu 40-2021 imatut akissuteqarput:

“Ilinniartitaanermut Aqutsisoqarfiup nalilerpaa, angalasartunik pilersitsinermit pisariaqartinneqassasut atorfiit pingasut, ukiuni pingasuni ingerlasussami aningaasarsianut- angalanermullu aningaasartuutitut qaffassaataasussamut kr. 8.000.000, aqutsisoqarfimmut tunniunneqartussat. Ilangullugu tassunga suliniummot annertusaanermi piumasaqaataassaaq, MISI-p kommunip ataaniittup nukittorsarneqarnissaa

¹ https://ina.gl/documents/para3637/2021/svar/040_2021_uddannelse_menneskerettigheder_NIOL_akissut.pdf



soorlu tarnit pissusaannik ilisimasallit amerlillugit, tamannalu aamma kommuninut aningaasarsiassanut annertusaataassaaq.”

Taakku saniatigut tikkuarusuppara, angalallutik suliaqartartussanik pilersitsinerup atuartunut immikkut pisariaqartitsisunut aammalu immikkut atuartitsinermut llinniartitaanermut aqutsiveqarfiup illoqarfinni aammalu qitiusumi pikkorissartitsisarnerat annikillisissinnaagaa.

Namminersorlutik inuussutissarsiortunut aningaasatigut allaffissornikkullu kingunerisassai

Soqanngilaq

Innuttaasunut aningaasatigut allaffissornikkullu kingunerisassai

Innuttaasut immikkut atuartitaasunik meeraqartut, ataatsimut isigalugu atuartitsinerup pitsaassusaanut atuartullu sullinnerannut pitsaanerulernerat malugissavaat.